



urlaubserinnerungen von Herbert Orthen

Ehrenmitglied der **komba gewerkschaft köln**



Ich hatt noch(k)eine Koffer op Sylt

(„Ich hab´ noch einen Koffer in Berlin“)

Wann mer för hätt en dr Urlaubzick zo verreise, överläch mer lang un ganz genau, wat alles an Pluute un sönstijem Krom met muss. Sinn et sujar 6 Woche, wet der Püngel für en all die Koffer immer jrößer. Wells de sulang och noch op de Insel Sylt fahre, bruchs de hück ze Dach och noch jenoch Jrosche. Donoh dann ävver et Jepäck en dr SUV, all Kreditkaate en de Täsch un av doför. Jo su ov ähnlich läuf dat hück av.

Bei mir wor et ävver ganz anders. 1956 sollt, durf oder moot ich för die anjesprochene lange Woche zur Kindererholung op die Drauminsel, vun der ich bis dohin noch nit vill woss. Ich wor nit dr Allerjörßte un hat och verdamp winnich op de Rebbe. De Ieserbahn (DB), dr Arbeitjeber vun mingem Bap, hat do op Sylt em Veedel Rantum e Heim vör Pänz. He sollt ich su ze saje objepäppelt wede. De Mamm packte unsere einzije jroße Koffer un mer brahten in mem Rad dann 3 Dach för Avreis an de Jepäckaufgabe nom Kalker Bahnhoff. Hä sollt jo pünklich do sinn.

Spät ovends em Aujuss jingk de spannende Zochfahrt vum Hauptbahnhoff, met 5 andere Fente em Abdeil, los. No dem mer uns schon jet kennejeliert hatte, wod jeschlofe. Wie ich et etzte mol rusjeluurt hann, kunnt ich em halfdüstere Hamburg-Harburg lese. Irjendwann später wod et ävver spannend. De Zoch fuhr övver dr Hindenburg-Damm, links un rächs nur Wasser. En dr Hauptstadt Westerland anjekumme, woote mer dann met nem kleine Būsje zo dem Heim in Rantum jefahre. Dat Huus hat der schöne Name „Köln“. Mer woote fründlich bejröß un op de Zemmer verdeilt. He sollte mer dann uns Pluute enrüme. Ävver för mich jov et nix zo dunn. Minge Koffer wor noch nit do un ich maat e lang un bedröv Jeseech. De Erzieherinne woote all Tant` jenannt. För ming Jrüppche wor dat de Tante Helga.

Die hat jetz die Aufjab, mich bei Laune ze halde. Dat wood ävver von Daach zo Daach schwerer, denn ich moot wigger op ming Klamotte waade.

Zohuus en Kölle passeerte enzwesche jet ganz anderes. Ming Eldere krääten en Postkaat vun der Bahn met dä Froch „wat dann eijentlich met dem Koffer am Bahnhoff wör un endlich

avjeholt wööd“? Janz schön om Päd, het dr Bap dann Rabatz jemaat un et wood im huh un hellich versproche, dat Deil als Expressgut no Sylt ze shecke.

Op Sylt hann ich lang jewaat un endlich no övver einer Woch kom hä endlich an. Die Zick, ohne frische Ungerbotz un Schlofanzoch hann ich dann flöck verjesse. De restliche Woche verjingke dann wie im Floch. Jeden Dach jingke mer am Strand spazeere un fuhren och ens met ner Inselbahn zom Leuchtturm no Hörnum un bes an dr Elleboge en List. De „Sansibar“ un et „Pony“ en Kampen jov et noch nit.

Et Resümee es: Jod erholt un och jet zojenomme, kom ich widder jlöcklich en Kölle ahn. De Tant` Helga un et ganze Personal hätt uns en der ganze Zick bestens versorch, un keiner vun all dä Pänz hatt Heimwieh. Et bliev bes hück en wunderbare Erinnerung an dat Traum-Resort in Rantum.

Ühre Häbääät!